



Inatsisartuni ilaasortaq Kristian Jeremiassen, Siumut  
-/Maani

**Qasigiannuani erngup nukinganik innaallagissiorfissaq pillugu § 37  
naapertorlugu apeqqummut nr. 2012-045-imut akissuteqaat**

17. februar 2012  
Sagsnr. 2012-061760  
Dok. Nr. 830318

Asasara Kristian Jeremiassen

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanoq.gl  
www.nanoq.gl

Aallarniutigalugu siunissami Qasigiannuani erngup nukinganik  
innaallagissiorfiliornissaq pillugu apeqquteqarninnut qutsavigissavakkit, taannalu  
matuma kinguliani akissuteqarfignissavara.

**Qasigiannugit eqqaani erngup nukissiorfiliornissamut misissuinerit manna  
tikillugu tunngavissanik 2010-imi 2011-amilu misissuinerit qanoq  
kinguneqarsimappat?**

**Akissut**

Qasigiannuani aamma Aasianni erngup nukinganik innaallagissiorfiliornissamut  
atugassanut siunnersuutip inaarutaasup 2012-imi februaarip naanerani  
naammassinissaa naatsorsuutigineqarpoq. Atugassanut siunnersuut  
misissueqqaarnermut, aalajangiinissamut tunngavissap suliarineqannginnerani  
ingerlanneqartartumut tunngasuvoq. Ineqarnermut, Attaveqarnermut Angallanermullu  
atugassanut siunnersuutaagallartumik (2011-mi marsimi), kiisalu 2010-mi aamma 2011-  
mi erngup nukinganik misissuinerit inernerigallagaannik (2012-imi januaarimi)  
tigusaqarpoq. Tamatuma saniatigut atugassanut siunnersuut 1984-imeersoq  
pigineqarpoq, tassanilu paasissutissat suli atorneqarsinnaapput. Paasissutissat  
pigineqarallartut taakku tunngavigalugit imaattumik ilisimatitsinnaavunga:

Misissueqqaarnerni tunngaviusut atugassanut siunnersuummut 1984-imeersumut  
sanilliullutik 2010-mi annertuumik allannguuteqarput. Ukiuunerani imaatigut  
angalasarnermi pissutsit eqqarsaatigalugit sakkortusaavik aammalu sakkortusaavimmiit  
sulluliaq atugassanut siunnersuummi 1984-imeersumi inissiiffinnut sanilliullutik  
nuunneqarput. Tassalu erngup nukinganik innaallagissiorfiup qanitaani talittarfiup  
inissiiffissaa sumiiffimmut sikuneq ajortutut naatsorsuutigineqartumut  
inissinneqartussanngorlugu allanngortinneqarpoq. Tamanna pingaartumik ukiuunerani  
qamittoornermi sakkortusaavimmik sullissinermut pingaaruteqartussaavoq. Atugassanut  
siunnersuummi 1984-imeersumi kujataata kangiani aamma kujataata kitaani  
aaqqiisinnaaneq sammineqarpoq. Qinigassat marluk taakku toqqarneqanngillat,  
inissisimaffii ukiuunerani imaatigut angalasarnissaq eqqarsaatigalugu  
ulorianaateqartutut isigineqarmata.

Tassalu avannaata avannamut kitaanut tunngatillugu misissueqqaarnerit aallaqqaaterpiangajaannit aallartinneqarnissaat pisariaqarsimavoq. Kisiannili atugassanut siunnersuummi 1984-imeersumi imermut tunngatillugu misissueqqaarnerit sulii atorineqarsinnaapput.

Misissuinerit amerlangaatsiartut suliarineqareerput, taakkununga sajuppillatsitsisarlu misissuinerit, erngup sarfarneranut uuttuutunik imermullu uuttuutunik ikkussuinerit, tunisinissamut tunngavissanik aalajangersaanerit il.il. ilaallutik, taakkulu inernerit inaarutaasut atugassanut siunnersuummi suliarineqartumi takuneqarsinnaassapput.

Taamaattorli inernerugallartut ilai misissuinerit pigineqartuni takuneqarsinnaareerput. Sermersuup siunissami tasinngortamut kuuttarnissaa pillugu GEUS nalunaarusiorsimavoq, tassanilu allassimavoq siunissami imeq isumalluutigineqartussa q naammassasoq.

Misissukkat inernerigallagaat tunngavigalugit teknikkikkut misissuinerit inernerinik, suliasap piviusunngortinnissaanut akerliusunik takkuttoqanngilaq. Teknikikkut misissuinerit inernerit maannamut pitsaasuupput.

Misissueqqaarnerit inernerisa saniatigut suliasap siuarsaqinnissaanut aalajangiinissamut suliasami aningaasartuutissat, taassuma imminut akilersinnaassusissaa atuisunullu akit naliliiffigineqarnissaat apeqqutaassapput. Innaallagissiofissaq uuttuummut ataatsimut aningaasartuutit 50%-inik qaffannerinik nassataqassasoq Nukissiofiit naliliipput, taannaannarlu isigissagaanni atuisunut akit qaffattussaassapput.

Kalaallit Nunaat ukiuni kingullerni erngup nukinganik innaallagissiofinnut amerlasuunik aningaasaliissuteqartarpoq, kingullermik Ilulissani erngup nukinganik innaallagissiofiup sananeqarnissaanik Naalakkersuisut akuersissuteqarnerisigut taamatut pisoqarluni. Erngup nukinga siunissami ungasissumi inuiaqatigiit aningaasaqarnerannut aammalu nukissiuuteqarnermi politikikkut iluaqutaasussatut naliliiffigineqarmat aningaasaliisoqarpoq. Taamaattumik Nukissiofinnut sanaartornermut taarsigassarsiarititat akilersorneqareernissaannut apparnissaannulluunniit erngup nukinganut amerlasuunik aningaasaleeqqinnissap utaqqitinneqarnissaa isumatusaarnertut naliliiffigineqarpoq. Erngup nukinganut innaallagissiofiit atuisut nukissiuutitut akiligassaasa pisariaqanngitsumik amerlitinneqarnerinik nassataqannginnissaat Naalakkersuisunit eqqumaffigineqartorujussuuvuq.

Atugassanut siunnersuutip inaarutaasup marsip ingerlanerani piareernissaa naatsorsuutigineqarpoq, kisiannili siunnersuummi inerniliinerit matuma siuliani taaneqartunit allaanerungaarnissaat naatsorsuutigineqanngilaq.

Inussiarnersumik inuulluaqqusillunga

Jens B. Frederiksen